

四庫全書

集部

欽定四庫全書

集部

王子安集卷一至三

詳校官監察御史_臣劉涓

檢討_臣何思鈞覆勘

總校官檢討_臣何思鈞

校對官編修_臣曹錫齡

謄錄監生_臣吳向仁

欽定四庫全書

集部二

王子安集

別集類一 唐

提要

臣等謹案王子安集十六卷唐王勃撰勃字
子安絳州龍門人高宗時官虢州參軍事迹
具唐書文苑傳傳稱其文集三十卷而楊炯
集序則謂分為二十卷具諸篇目洪邁容齋
隨筆亦稱今存者二十卷蓋宋代所行猶其

舊本明以來其集已佚原目遂不可考世所傳初唐十二家集僅載勃詩賦二卷闕畧殊甚故皇甫汈作楊炯集序稱王詩賦之餘未睹他製此本乃明崇禎中閩人張燮搜輯苑英華諸書編為十六卷雖非唐宋之舊而以視別本則較為完善矣勃文為四傑之冠儒者頗病其浮艷案段成式酉陽雜俎曰張燕公嘗讀勃夫子學堂碑頌帝車南指道

七曜於中階華蓋西臨高五雲於太甲四句

悉不解訪之一公

案一公謂傳一行也

一公言北斗建

午七曜在南方有是之祥無位聖人當出華

蓋以下卒不可悉洪邁容齋隨筆亦曰王勃

等四子之文皆精切有本原其用駢儷作記

序碑碣蓋一時體格如此而後來頗議之杜

詩云王楊盧駱當時體輕薄為文哂未休爾

曹身與名俱滅不廢江河萬古流正謂此耳

身名俱滅以責輕薄子江河萬古指四子也
韓公滕王閣記云江南多游觀之美而滕王
閣獨為第一及得三王為序賦記等壯其文
詞註謂王勃作游閣序又云中丞命為記竊
喜載名其上詞列三王之次有榮耀焉則韓
之所以推勃亦為不淺矣夫一行段成式博
洽冠絕古今杜甫韓愈詩文亦冠絕古今而
其推勃如是枵腹白戰之徒掇拾語錄之糟

粕乃沾沾焉而動其喙殆所謂虬螭撼樹者
歟今錄勃集併錄成式及邁之所記庶耳食
者無輕詆焉乾隆四十六年九月恭校上

總纂官臣紀昀臣陸錫熊臣孫士毅

總校官臣陸費墀

--	--	--	--	--	--	--	--

王子安集原序

大矣哉文之時義也有天文焉察時以觀其變有人文焉
立言以重其範歷年茲久邇為文質應運以發其明因
人以通其粹仲尼既沒游夏光洙泗之風屈平自沈唐
宋弘汨羅之跡文儒於焉異術詞賦所以殊源逮秦氏
燔書斯文天喪漢皇改運此道不還賈馬蔚興已虧於
雅頌曹王傑起更失於風騷僊俛大猷未忝前載泊乎
潘陸奮發孫許相因繼之以顏謝申之以江鮑梁魏羣

材周隋衆制或苟求蟲篆未盡力於丘墳或獨徇波瀾
不尋源於禮樂會時沿革循名抑揚多守律以自全罕
非常而制物其有飛馳倏忽倜儻紛綸鼓動包四海之
名變化成一家之體蹈前賢之未識探先聖之不言經
籍為心得王何於逸契風雲入思叶張左於神交故能
使六合殊材並推心於意匠八方好事咸受氣於文樞
出軌躅而驤首馳光芒而動俗非君之博物孰能致於
此乎君諱勃字子安太原祁人也其先出自有周濬啟

文明之裔隱乎炎漢弘宣高尚之風晉室南遷家聲布
於淮海宋臣北徙門德勝於河汾宏材繼出達人間峙
祖父通隋秀才高第蜀郡司戶書佐蜀王侍讀大業末
退講藝于龍門其卒也門人諡之曰文中子閭風睹與
起予道唯揣摩三古開闡八風始擯落於鄒韓終激揚
於荀孟父福時歷任太常博士雍州司功交趾六合二
縣令為齊州長史抑惟邦彥是曰人宗絕六藝以成能
兼百行而為德司馬談之晚歲思弘授史之功揚子雲

之暮年遂起叅主之歎君之生也含章是託神何繇降
星辰竒偉之精明何由出家國賢才之運性非外獎智
乃自然孝本乎末名人應乎初識器業之敏先乎就傳
九歲讀顏氏漢書撰指瑕十卷十歲包綜六經成乎期
月懸然天得自符昔訓時師百年之學旬日兼之昔人
千載之機立談可見居難則易在塞咸通於術無所滯
於詞無所假幼有鈞衡之畧獨負舟航之用年十有四
時譽斯歸太常伯劉公巡行風俗見而異之曰此神童

也因加表薦對策高第拜為朝散郎沛王之初建國也
博選奇士徵為侍讀奉教撰平臺鈔畧十篇書就賜帛
五十疋先鳴楚館孤峙齊宮秉忌側目應劉失步臨秀
不容尋反初服遠遊江漢登降岷峨觀精氣之會昌翫
靈竒之肝蠻考文章之跡徵造作之程神機若助日新其
業西南洪筆咸出其詞每有一文海內驚瞻所製九隴
縣孔子廟堂碑文宏偉絕人稀代為寶正平之作不能
奪也咸亨之初乃叅時選三府交辟遇疾辭焉友人陵

季友時為號州司法盛稱弘農藥物廼求補號州參軍
坐免歲餘尋復舊職棄官沈跡就養于交趾焉長卿坐
廢於時君山不合於朝豈無媒也其惟命乎富貴比於
浮雲光陰踰於尺璧著撰之志自此居多觀覽舊章翺
翔羣藝隨方滲漉于何不盡在乎詞翰倍所用心嘗以
龍朔初載文場變體爭構纖微競為雕刻矐之金玉龍
鳳亂之朱紫青黃影帶以徇其功假對以稱其美骨氣
都盡剛健不聞思革其弊用光志業薛令公朝右文宗

託末契而推一變盧照鄰人間才傑覽清規而輟九攻
知音與之矣知已從之矣於是鼓舞其心發洩其用八
紘馳驟於思緒萬代出沒於毫端契將往而必融防未
來而先制動搖文律宮商有奔命之勞沃蕩詞源河海
無息肩之地以茲偉鑒取其雄伯壯而不虛剛而能潤
雕而不碎按而彌堅大則用之以時小則施之有序徒
縱橫以取勢非鼓怒以為資長風一振衆萌自偃遂使
繁綜淺術無藩籬之固紛繪小才失金湯之險積年綺

碎一朝清廓翰苑豁如詞林增峻反諸宏博君之力焉
矯枉過正文之權也後進之士翕然景慕久倦樊籠咸
思自釋近則面受而心服遠則言發而響應教之者逾
於激電傳之者速於置郵得其片言而忽焉高視假其
一氣則邈矣孤鶩竊形骸者既昭發於樞機吸精微者
亦潛附於聲律雖雅才之變例誠壯思之雄宗也好異
之徒別為縱誕專求恠說爭發大言乾坤日月張其文
山河鬼神走其思長句以增其滯客氣以廣其靈已逾

江南之風漸成河朔之制謬稱相述罕識其源扣純粹
之精機未投足而先逝覽奔放之偏節已滯心而忘返
迺相循於跼步宜見習於通方信譎不同非墨翟之過
重增其放宜莊周之失唱高罕屬既知之矣以文罪我
其可得乎君以為摘藻彫章研幾之餘事知來藏往探
賸之所宗隨時以發其惟應便稽古以成其殆察微循
紫宮於北門幽求聖律訪玄扈於東洛響像天人每覽
韋編思弘大易周流窮乎八索變動該乎四營為之發

揮以成注解嘗因夜夢有稱孔夫子而謂之曰易有太極子其勉之寤而循環思過半矣於是窮著蔡以象告考爻彖以情言既秉理而得玄亦研精而循道虞仲翔之盡思徒見三爻韓康伯之成功僅踰兩繫君之所注見光前古與夫發天地之秘藏知鬼神之情狀者合其心矣君又以幽贊神明非杼軸於人事經營訓導迺優游於聖作於是編次論語各以羣分窮源造極為之古訓仰貫一以知歸希體二而致遠為言式序大義昭然

大中子之居龍門也睹隋室之將喪知吾道之未行循
歎鳳之遠圖宗獲麟之遺制裁成大典以贊孔門討論
漢魏迄於晉代刪其詔命為百篇以續書甄正樂府取
其雅奧為三百篇以續詩又自晉太熙元年至隋開皇
九年平陳之歲褒貶行事述元經以法春秋門人薛收
竊慕因為元經之傳未就而歿君思崇祖德光宣奧義
續薛氏之遺傳制詩書之衆序包舉藝文克融前列陳
羣稟太丘之訓時不逮焉孔伋傳司寇之文彼何功矣

詩書之序並冠於篇元經之傳未終其業命不我與有
涯先謝春秋二十八皇唐上元三年秋八月不改其樂
顏氏斯殂養空而游賈生終逝嗚呼天道何哉所注周
易窮乎晉卦又注黃帝八十一難幸就其功撰合論十
篇見行於代君平生屬文歲時不倦綴其存者纔數百
篇嗟乎促齡材氣未盡歿而不朽君子貴焉兄勗及勵
磊落詞韻鏗錡風骨皆九變之雄律也弟助及勛摠括
前藻網羅羣思亦一時之健筆焉友愛之至人倫所及

永言存歿何痛如之援翰紀文咸所未忍蓋以投分相
期非宏詞說潛然擘涕究而序之分爲二十卷具諸篇
目三部盛作恨不序於生前七志良書空得撰於身後
神其不遠道或存焉華陰楊炯撰

欽定四庫全書

原序

欽定四庫全書

王子安集卷一

唐 王勃 撰

賦

春思賦 并序

咸亨二年余春秋二十有二旅寓巴蜀浮遊歲序殷憂
明時坎壈聖代九隴縣令河東柳太易英達君子也僕
從游馬高談胸懷頗洩憤懣于時春也風光依然古人

云風景不殊舉目有山河之異不其悲乎僕不才耿介之士也竊稟宇宙獨用之心受天地不平之氣雖弱植一介窮途千里未嘗下情於公侯屈色於流俗凜然金石自匹猶不能忘情於春則知春之所及遠矣春之所感深矣此僕所以撫窮賤而惜光陰懷功名而悲歲月也豈徒幽宮狹路陌上桑間而已哉屈平有言目極千里傷春心因作春思賦庶幾乎以極春之所至析心之去就云爾

若夫年臨九域韶光四極解宇宙之嚴氣起亭臯之春色况風景今同序復江山之異國感大運之虛盈見長河之紆直蜀川風候隔秦川今年節物異常年霜前柳葉銜霜翠雪後梅花犯雪妍霜前雪裏知春早看柳看梅覺春好思萬里之佳期憶三秦之遠道淡蕩春色悠揚懷抱野何樹而無花水何堤而無草於是僕本恨人平生自淪懷書去洛抱劍辭秦惜良會之遒邁厭他鄉之苦辛忽逢邊候改違憶帝鄉春帝鄉迢遞關河裏神之

臯欲暮風烟起黃山半入上林園玄灞斜分曲江水玉
臺金闕紛相望千門萬戶遥相似昭陽殿裏報春歸未
央臺上看春暉水精却掛鴛鴦幔雲母斜開翡翠幃競
道西園梅色淺爭知北闕柳陰稀斂態調歌扇迴身整
舞衣銀蠶吐絲猶未暖金燕銜泥試學飛妾本幽閨學
歌舞寧知漢代多巡撫前年齋祭謁甘泉今歲笙簫祠
后土桃花萬騎喧長薄蘭葉千旗照平浦見原野之芳
春憶山河之遠古長安路狹遠長安公子春來不厭看

杏葉裝金轡蒲萄鏤玉鞍
聳蓋臨平樂迴笳出上蘭
上蘭經鄆杜揮鞭日將暮
白馬新臨御溝道青牛近
出章臺路章臺接建章垂
柳復垂楊草開馳馬埒花
滿聞雞塲南隣少婦多妖
婉北里王孫駐行幘乍怪
前春節候遲預道今年寒
食晚傷紫陌之春度惜青
樓之望遠紫陌青樓照月
華珠帷黼帳七香車蛾眉
畫來應幾樣蟬鬢梳時半
欲斜恨雕鞍之屆晚痛銀
箭之更賒行行避葉步步
看花因狂夫之蕩子成賤
妾之倡家狂夫去去

無窮已賤妾春眠春未起自有蘭閨數十重安知榆塞
三千里榆塞連延玉關側雲間沉沉不可識葱山隱隱
金河北霧裏蒼蒼幾重艷忽有驛騎出幽并傳道春衣
萬里程龍沙春草遍瀚海春雲生疎勒井泉寒尚竭燕
山烽火夜應明聞道河源路遠遠誰教夫壻苦行行君
行塞外多霜露為想春臺起烟霧遊絲空罥合歡枝落
花自遠相思樹春望年年絕幽閨離緒切春色朝朝異
邊廷羽書至都護新封萬里侯將軍稍定三邊地長旆

猶銜掃雲色寶刀尚擁千星氣昨夜祁連驛使還征夫
猶在鴈門關君度山川成白首應知歲序歇紅顏紅顏
一別成胡越夫壻連延限城關羌笛橫吹隴路風戎衣
直照關山月春色徒盈望春悲殊未歇復聞天子幸關
東馳道烟塵萬里紅析羽搖初日繁笳思曉風後騎猶
分長樂館前旌已映洛陽宮洛陽宮城紛合沓離房別
殿花周匝河陽別舍抵長河丹輪紺轡相經過戚里繁
珠翠中閨盛綺羅鳳移金谷舞鶯引石城歌向夕天津

洛橋暮爭驅紫燕黃牛度閒居伊水園舊宅却山路武
子新布金錢埒季倫欲碎珊瑚樹復道西墉春霧寡更
值南津春望寫入金市而乘羊出銅街而試馬葉抱露
而爭密花牽風而亂下錦障縈山羅幃照野司空令尹
之博物二陸三張之丈雅新年柏葉之樽上已蘭英之
筍春來併是春何啻兩道秦忽逢江外客復憶江南春
羅衣東北渚錦袖出東隣江邊小婦無形迹特怨狂夫
事行役鳳凰山上花無數鸚鵡洲中草如積春江澹容

與春期無處所春水春魚樂春汀春鴈舉君道玉門關
何如金陵渚為問逐春人年光幾處新何年春不至何
地不宜春亦有當春逢遠客亦有當春別故人風物雖
同候悲歡各異倫歸去春山恣閒放蕙晚蘭舉行可望
何為悠悠坐惆悵比來作客住臨邛春風春日自相逢
石鏡巖前花屢密玉輪江上葉頻濃高平灞岸三千里
少道梁山一萬重自有春花煎別思無勞春鏡照愁容
盛年耿耿辭鄉國長路遙遙不可極形隨朗月驟東西

思逐浮雲幾南北春蝶參差命儔侶春鶯綿蠻思羽翼
余復何為此方春長歎息會當一舉絕風塵翠蓋朱軒
臨上春朝昇玉署調天紀夕憩金閨奉帝綸長卿未達
終希達曲逆長貧豈剩貧年年送春應未盡一旦逢春
自有人

七夕賦

若夫乾靈鵲識之端地輔龍驂之始憑紫都而受厯按
玄丘而命紀鳳毛鍾桂間之祥麟角燦椒庭之祉馳朱

軒於九域振黃麾於萬里抗芝館而星羅擢蘭宮而霞起
則有皇慈霧洽聖渥天浮庭分玉禁邨瞰金樓剪鳬洲
於細柳披鶴籞於長楸啟魚鈴而分帝術授虹壁而控
神州擁黃山於石磴洩玄灞於銅溝列瑤牕而送燠闢
銀榜而迎秋君王乃排青幌搖朱舄戒鵷輿靜鸞掖繞
露廊而轉步僊雲阡而縱跡嘯陳客於金牀命淮仙於
桂席翔翠罕於金甸迎吹簫於鳳驛佇靈匹於星期眷
神姿於月夕於時玉繩湛色金漢餘光烟淒碧樹露濕

銀塘視蓮潭之變彩見松院之生涼引驚蟬於寶瑟宿
蘭燕於瑤筐綠臺兮千仞蘋樓兮百常拂花筵而慘惻
披葉序而徜徉結暹情於漢陌飛永睇於霞莊想佳人
兮如在怨靈歡兮未揚促暹悲於四運味遺歌於七襄
於是此簷晚靜魚扃夜飾忘帝子之光華下君王之顏
色握犀管展魚箋顧執事招仲宣仲宣跪而稱曰臣聞
九變無津三靈有作布元氣於浩蕩運太虛於寥廓辨
河鼓於西堧降天孫於東壻循五緯而清黃道正三衡

而澄紫落海人支石之機江女穿針之閣鄙塵情於春
念擬仙契於秋諾河光清地紀山氣飲天標霜凝碧宙
水瑩丹霄耀麟軒於霧術褰羽旆於星橋徵赤螭而架
渚漾青翰而乘潮停翠梭兮卷霜縠引駕杼兮割冰綃
舉黃花而乘月駕籠黛葉而卷雲翹撫今情而恨促指
來渚而傷遙既而丹軒黃一作萬拱紫房朱一作千簷仙御
逶遲靈徒擾弱風驚雨驟烟迴電爍媧皇召巨野之龍
莊叟命雕陵之鵲駐麟駕披鸞幕奏雲和汎霞酌碧虬

玉室之饌白兔銀臺之藥荷葉蘋鮫芙蓉青雀上元錦
書傳寶字王母瓊箱薦金約綵襟魚頭比目縫香緘燕
尾同心縛羅帳五花懸珎砌百枝然下芸幃而暱枕弛
蘭服而交筵託新歡而密勿懷往眷而潺湲於是羈鸞
切鏡旅鶴驚絃悲侵玉履念起金鈿儼歸裝而容曳
整還蓋而遷延洞庭波兮秋水急關山晦兮夕露連謂
河漢之無浪似參商之永年君王乃背彤砌陟玄室沖
想自閒神情如逸痛靈妃之稀偶嘉沉思之可畢荆艷

齊升燕佳並出金聲玉韻蕙心蘭質珠櫳綺檻北風臺
繡戶雕牕南向開響曳紅雲歌面近香隨白雪舞腰來
掩清琴而獨進淩絳樹而輕迴盧女黃金之枕張家碧
玉之杯奉君王於終夕夫何怨於良媒俄而月還西漢
霞臨東沼鳬氏鳴秋雞人唱曉玉闌控鶴瓊林飛鳥君
王乃馭風殿而長懷俯雲臺而自矯矜雅範而霜高穆
沖襟而霞眇迎十客召三英香涵蔗酎吹肅蘭旌娃館
疎兮綠草積歡房寂兮紫苔生聳詞源於月徑披翰藪

金史卷一百一十五
卷一
於雲扃方絕元凱而高視宜與梁楚而駢聲

九成宮東臺山池賦 并序

九成宮東臺地接閒曠面山臨水爾其松峯桂壑紅泉
碧磴金石千聲雲霞萬色侍郎張公雅思沉鬱永懷梓
匠式侔仙造聿構靈廔纖波成止水之源拳石儼干霄
之狀雖流波覆簣俯藉人機而布葉攢花渺同天會僕
因暇日濫奉清埃敢抽南畝之才聊叙東山之事云爾
若夫金臺妙境玉署仙居酌丹池一作之曉暇候青禁

之宵餘驟冲情於月道飛峻賞於烟墟指山楹而思逸
懷水鏡而神虛既而仰瞻頽嶠傍窺黛壑複嶂烟迴攢
溪霧錯偉沉用之兼濟想神功之可作規疊巖於盤龍
憲飛泉於挂鶴覆簣而縈巖磴浮芥而環川壑採拳石
於瑤濱寒纖珠於綺薄萍徙楚江之蒂花轉崑墟之萼
岫蘊玉而虹驚浦涵珠而星落美仁智之同歸信高深
之縱託爾其危岑漏景曲渚留寒高松偃鶴清篠鳴鸞
被蘭丘而結珮照蓮服而披冠激坳堂於別淑引膚寸

於危巖若乃嶺橫難秀波連鳳液花鳥紫紅蘋魚漾碧
綠衣玄袵蘋鱗翠額在林藪而同歡望江湖而齊適及
夫景沉西崕月下東濱峰深夜久潭靜秋新荷抽水葢
薜引山茵雪芝獻液露菊傾津嗣南商之逸興有東海
之遐賓保林泉而肆賞混簪紱而同塵何濯纓之有地
如攀桂之無因

遊廟山賦

并序

玄武山西有廟山東有道君廟蓋幽人之別府也長蘿

巨樹梢翳雲日王子馭風而遊冷然而善蓋懷霄漢之
舉而忘城闕之戀矣因欲攀洪崖於烟道邀羨門於天
路仙師不存壯志徒爾俄而泉石移景秋陰方積松柏
羣吟悲聲四起背鄉關者無復向時之榮焉嗚呼有其
志無其時則知林泉有窮路之哭一作嗟烟霞多後時之
歎不其悲乎遂作賦曰

陟彼山阿積石戕戕亭臯千里傷如之何啟松崖之窵
蔭攀桂岳之崇柯隔浮埃於地絡披顓氣於天羅爾其

綠巖分徑蒼岑對室菌軒丹絢芝場翠密俯泉石之清
冷臨風飈之瑟颺仰紺臺而攜手望玄都而容膝於是
躡霞罔於玉砌步雲岳於金壇懷妙童與真女想青螭
及碧鸞情恍恍而將逸心迴迴而未安見丹房之晚晦
知紫洞之宵寒既而露昏千嶂烟浮四野恨流俗以情
多痛飛仙之術寡驅逸思於方外局高情于天下使蓬
瀛可得而宅焉何必懷於此都也亂曰已矣哉吾誰
欺林壑逢地烟霞失時託宇宙兮無日俟鸞虬兮未期

他鄉山谷祇令人悲

寒梧棲鳳賦

鳳兮鳳兮來何所圖出應明主言棲高梧梧則嶧陽之
珍木鳳則丹穴之靈雛理符有契誰言則孤遊必有方

駭一作哂南飛之驚鵲音能中呂嗟入夜之啼烏況其靈

光蕭散節物淒清疎葉半殞高歌和鳴鳥也將託其宿
止人也焉知乎此情月照孤影風傳暮聲將振耀其五
色俟簫韶之九成九成則那率舞而下懷彼衆會罔知

淳化雖壁沼可飲更能適於醴泉雖瓊林可棲復想巡
於竹榭念是欲往敢忘晝夜苟安安而能遷則思思其
不暇故當披拂寒梧翻然一發自此西序言投北闕若
用之銜詔冀宣命於軒堦若使之游池庶承恩於歲月
可謂擇木而俟處卜居而後歆豈徒比跡於四靈常栖
栖而沒沒

江曲孤鳬賦

并序

梓州之東南涪江之所合有潭焉周數十步青壁絕地

綠波澄天常有孤鳬棲蕩其側飛沉翻啞而天性不違
嗟乎宇宙之容我多矣造化之資我厚矣何必處華池
之內而求稻粱之恩哉遂作賦曰

靈鳳翔兮千仞大鵬飛兮六月雖憑力而易舉終候時
而難發不如深潭之鳥焉順歸潮而出沒迹已存於江
漢心非繫於城闕吮紅藻翻碧蓮刷霧露棲雲烟迫
之則隱馴之則前去就無失沉浮自然爾乃忘機絕慮
懷聲弄影乘駭浪而神驚漾澄瀾而趣靜恥園籬之戀

促悲塞鴻之赴永知動息而多方屢訟洄而自省故其
獨泛單宿全真遠致反覆幽溪淹留勝地傷雲鴈之嬰
繳懼泉魚之受餌甘辭稻粱之惠焉而全飲啄之志也

馴鳶賦

海上兮雲中青城兮絳宮金山之斷鶴玉塞之驚鴻謂
江湖之漲不足憩謂宇宙之路不足窮終銜石矢坐觸
金籠聲酸夕露影怨秋風已矣哉何氣高而望闊卒神
痺而智瘡徒驚迹於仙遊竟纏機於俗網未若茲禽猶

融泛想慚丹丘之麗質謝青田之逸響與道浮沉因時
俯仰去非內懼馴非外獎夫勁翮揮風雄姿觸霧力制
烟道神周天步鬱霄漢之弘圖受園亭之近顧質雖滯
於城闕策已成於雲路陳平負郭之居韓信昌平之寓
似達人之用晦混塵蒙而自託類君子之含道處蓬蒿
而不忤悲授餌之徒懸痛開弦之自落故爾放懷於誕
暢因此寄心於寥廓

王子安集卷一

欽定四庫全書

王子安集卷二

唐 王勃 撰

賦

採蓮賦 并序

昔之賦芙蓉者多矣雖復曹王潘陸之逸曲孫鮑江蕭
之妙韻莫不權陳麗美粗舉採掇豈所謂究厥麗態窮
其風謠哉頃承暇景歷覩衆製伏翫累日有不滿焉遂

作賦曰

非登高可以賦者唯採蓮而已矣况洞庭兮紫波復瀟
湘兮綠水或暑雨兮朝霽乍涼風兮暮起黛葉青跼烟
周五湖紅葩絳蕩電鑠千里尤見重於幽客信作謠於
君子爾其珍族廣茂淑類傳鮮藻河渭之空曲被沮漳
之淪漣燭澄灣而爛爛亘修漲之田田宜直水區澤國
江滸海壩是以吳娃越豔鄭婉秦妍感靈翹於上節悅
瑞色於中年錦帆映浦羅衣塞川飛木蘭之畫櫓駕芙

蓉之綺船問子何去幽潭採蓮已矣哉誠不知其所以
然賞由物召興以情遷故其遊泳一致悲欣萬緒至若
金室麗妃璇宮佚女傷鳳臺之寂寞厭鸞扃之閒處侍
飲南津陪歡北渚見磯岸之紆直覩旌旄之低舉上苑
神池芳林御陂樓陰架汴殿綵乘漪張拜洛之容衛備
橫汾之羽儀簫鼓發兮龍文動鱗羽喧兮鷁首移咸覩
粧而麗服各分驚而並馳蘋紫漿礙荇觸船危視雲霞
之沃蕩望林泉之蔽虧川泱泱兮菡萏積水湛湛兮芙

萼披惜歲時兮易暮傷君王兮未知折紉房與綳的攬
紅葩及碧枝迴綃裙兮竊獨歡步羅襪兮私自竒莫不
驚香悼色畏別傷離復有渚宮年少期門公子翠髮蛾
眉頰脣皓齒傅粉蘭臺之上偷香椒房之裏亦復銜恩
激誓佩寵絨愁承好賜之珍席奉嬉宴之彩旂繡棟照
兮翠羽帳瑤塘曙兮青翰舟攀條拾藥沒波汴流池心
寬而藻薄浦口窄而萍稠和撓姬之衛吹接榜女之齊
謳去復去兮水色夕採復採兮荷華秋願承歡而卒歲

長接席而寡仇于時薊北無事關西始樂霧靜江垠氛
恬海漠寢怪氣於沅湘照榮光於河洛殊方異類舞詠
相錯王公卿士歌吹並作則有侯家瑣第戚里芳園穿
池瀾岍之曲蓄水河陽之源隄防谷口島嶼輾輾嘉木
畢植靈草具繁沉桂北之丹藕擢荆南之紫根鬱萋萋
而霧合粲盥盥而霞翻洎乎氣徹都鄙景萃川陸麥雨
微涼梅颺淺燠命妖侶於石城嘯娛朋於金谷乃使綠珠
捧棹青琴理舳舻芳醪藉珍餽汎玉潭之瀾漫遶金

渠之隈隩石近水而苔濃岸連山而樹複排芟末而爭
遠託蘆間而競逐赴汨淩波飛桂振羅風低綠幹水濺
黃螺上客喧兮樂未已美人醉兮顏將酡畏蓮色之如
臉願衣香而勝荷徘徊郢調悽愴燕歌念窮歡於水溪
誓畢賞於川阿結漢女邀湘娥北溪藥尚密南汀花更
多恨光景今不住諧芳馨兮謂何若乃南鄢義妻東吳
信婦結綺整佩承筐奉幣忽君子兮有行復良人兮遠
征南討九真百越北戍雞田鴈城念去魂駭相視骨驚

臨春渚兮一送見秋潭之四平與子之別烟波望絕念
子之寒江山路難水淡淡兮蓮葉紫風颭颭兮荷花丹
剪瑤帶而猶恨折瓊英而不歡既而緣隈逗浦返棹歸
櫓睠芳草兮已殘憶離居兮方苦延素頸於極漲攘皓
腕於神滸惜佳期兮未繇徒增思兮何補又若倡姬蕩
媵命侶招羣淇上洛表湘臯汝墳望洲草兮翡翠色動
浦水兮驪龍文願解佩以邀子思褰裳而從君悲時暮
愁日曛鳴環釧兮響窈窕艷珠翠兮光繽紛憐曙野之

絳氣愛晴天之碧雲棹巡汀而柳拂船向渚而菱分掇
翠莖以翳景籠朱萼以為裙挺楫凌亂雲流雨散鳴榔
絡繹霧罷煙釋狀飛虬之蜿蜒若驚鴻之奕奕艇怯奔
潮篙憎淺石絲着手而偏繞刺牽衣而屢襞乃有貴子
王孫承閒縱觀何平叔之符彩潘安仁之藻翰稅龍馬
於金堤命鳧舟於石岍錦纜翻灑銀檣照爛日側光沉
風驚浪深盼北渚之新贈恣東溪之密尋駕鸞繡彩之
文履玳瑁瓊華之寶琴扣舷擊榜吳歆越吟溱與洧兮

葉覆水淮與濟兮花冒潯值明月之夕出逢丹霞之夜
臨茱萸歌兮軫妾思兮藥曲兮傷人心伊採蓮之賤事
信忘情之蓋寡雖迹兆於水鄉遂風行於天下感極哀
樂聲參鄭雅是以緬察谷底窮覽地維北盡豐鎬滂涵
南究江沱越沂莫不俟期應節泝濤汎湄薄言採之興
言服之發文局之麗什動幽幌之情詩使人結眷令人
想思宜其色震百草香奪九芝棲碧羽之神雀負青丹
之寶龜紫袂流記丹經秘詞豈徒加繡柱之光彩添文

井之華滋已哉向使時無其族代乏厥類獨秀上清之
境不生中國之地學鸞鳳而時來與鸛鷀而間至必能
使衆瑞彩沒羣貺色沮湯武齋戒伊臯延佇宜俾夫秦
童趙僕倡姬豔女狎而翫之擷而採之乎時有東鄙幽
人西園舊客常陪帝子之輿經侍夫人之籍詠綠竹於
風曉賦朱華於月夕暑往寒來忽矣悠哉蓬飄梗逝天
涯海際似還邛之寥廓同適越之淫滯蕭索窮途飄飄
一隅昔聞七澤今遇五湖聽菱歌兮幾曲視蓮房兮幾

株非鄴地之宴語異睢苑之歡娛况復殊方別域重瀛
複嶂虞翻則故鄉寥落許靖則生涯惆悵感芳草之及
時懼修名之或喪誓將刻跡潁上棲影渭陽枕箕岫之
孤石汎碣溪之小塘餐素實兮吸絳芳荷為衣兮芰為
裳永潔已於丘壑長寄心於君王且為歌曰榮華息功
名惻竒秀兮異植紅光兮碧色稟天地之淑麗承雨露之
霑飾蓮有藕兮藕有枝才有用兮用有時何當婀娜花
實移為君含香藻鳳池

澗底寒松賦 并序

歲八月壬子旅遊於蜀尋茅溪之澗深蹊絕磴人跡罕
到爰有松焉冒霜停雪蒼然百丈雖高柯峻穎不能踰
其岸嗚呼斯松託非其所出羣之器何以別乎蓋物有
殊類而合情士有因感而成興遂作賦曰

惟松之植于澗之幽盤柯跨嶮沓抵憑流寓天地兮何
日凌霜露兮幾秋見時華之屢變知俗態之多浮故其
磊落殊狀森梢峻節紫葉吟風蒼條振雪嗟英鑒之稀

遇保真客之未缺攀翠嶠而形疲指丹霄而望絕已矣
哉蓋用輕則資衆器宏則施寡信棟梁之已成非榱桷
之相假徒志遠而心屈遂才高而位下斯在物而有焉
余何為而悲者

慈竹賦并序

廣漢山谷有竹名慈生必向內示不離本修莖巨葉攢
根沓柢叢之大者或至百千株焉而縈結踰乎咫尺好
事君子徙為堦庭之翫焉吁嗟非此土所有乃有厥流

俗之譏動鄉關之思者益撫高節而興歎覽嘉名而思
歸遂為賦曰

有竹猗猗生于高陂左連瑤帶右雜瓊枝恨幽客之方
賞嗟君侯之不知徙蔚丹谷遷榮綠池氣凜凜而猶在
色蒼蒼而未離屈巖壑之容貌充堦庭之羽儀爾其劃
疆分域駢陰抗趾疊幹龍迴攢根鳳峙防碧露於宵末
翳紅光於暈始崇柯振而雲靄生繁葉動而風颼起擁
涼砌之晨肅屏炎局之晝澤至若白藏載謝玄英肇切

塞北河堅關南地裂觀衆茂之咸悴驗貞輝之獨潔抽
勁綠以垂霜總嚴青而負雪蓋同類之常稟非殊方之
異節若乃宗生族茂天長地久萬牴爭盤千株競糾如
母子之鈎帶似閨門之悌友恐孤秀而成危每羣居而
自守付美名之天屬而和氣之冥受嗟乎道之存矣物
亦自有一作有之不背仁而貪地不藏節以遯時故其貞不
自炫用不見疑保夷險之無易晒榮枯之有期俄蓬轉
於岷徼遂萍流於江汜分兄弟於兩鄉隔晨昏於萬里

金少曰卷之二
撫貞容而骨愧伏嘉號而心死庶因感而長懷將策情而勵已

青苔賦 并序

吾之旅遊數月矣憩乎荒澗覩青苔焉緣崖而上乃喟然歎曰嗟乎苔之生於林塘也為幽客之賞苔之生於軒庭也為居人之怨斯擇地而處無累於物也愛憎從而生遂作賦曰

若夫桂洲蒼澗松崖祕液繞江曲之寒沙抱叢幽之古

石汎迴塘而積翠繁修樹而凝碧契山客之奇情諧野
人之妙適及其瑤房有寂瓊室無光霏微君子之砌蔓
延君侯之堂引浮青而泛露散輕綠而承霜起金鈿之
舊感驚玉筍之新行若夫弱質綿羃纖滋布護措形不
用之境託跡無人之路望夷險而齊歸在高深而委遇
惟愛憎之未染何悲歡之詭赴宜其背陽就陰違喧處
靜不根不蒂無華無影恥苑李之暫芳笑蘭桂之不永
故順時而不競每秉幽而自整

四言古詩

倬彼我系

勅兄勸序

倬彼我系舍弟號州叅軍勅所作也傷迫乎家貧道
未成而受祿不得如古之君子四十強而仕也故本其情
性原其事業因陳先人之迹以議出處致天爵之艱難也
倬彼我系出自有周分疆錫社派別支流居衛仕宋匡
羸相劉乃武乃文或公或侯晉代崩圻衣冠擾弊粵自
太原播徂江滢禮喪賢隱時屯道閉王室如燬生人多

殪伊我有器思逢其主自東旋西擇木開宇田彼河曲
家乎汾浦天未厭亂吾將誰輔伊我祖德思濟九埏不
常厥所于茲五遷欲及時也夫豈願焉其位雖屈其言
則傳爰述帝制大蒐王道曰天曰人是祖是考禮樂咸
若詩書具草貽厥孫謀永為家寶伊余小子信慚明哲
彼網有條彼車有轍思屏人事克終前烈于嗟代網卒
余來綫來綫伊何謂余曰仕我瞻先達三十方起夫豈
不懷高山仰止願言毓德啜菽飲水有烏反哺其聲嗷

嗽言念舊德憂心忉忉今我不養歲月其滔僣僣從役
豈敢告勞從役伊何薄求卑位告勞伊何來參卿事名
存實爽負信愆義靜言遐思中心是愧

五言古詩

上巳浮江宴韻得陟字

披觀玉京路駐賞金臺陟逸興懷九仙良辰傾四美松
吟白雲際桂馥清谿裏別有江海一作漢心日暮情何已

春日宴樂遊園韻得接字

帝里寒光盡神皋春望淡梅郊落晚英柳甸驚初葉流水抽奇弄崩雲灑芳牒清尊湛不空暫喜平生接

山亭夜宴

桂宇幽襟積松臺涼夜永森沈野逕寒肅穆巖扉靜竹晦南阿色荷翻北潭影清興殊未闌林端照初景

詠風

肅肅涼風

一作景

生加我林壑清驅煙尋磎戶卷霧出山

樞去來固無跡動息如有情日落山水靜為君起松聲

懷仙并序

客有自幽山來者啟予以林壑之事而烟霞在馬思
解纓紱永詠山水神與道超跡為形滯故書其事焉
鶴岑有奇徑麟洲富仙家紫泉漱珠液玄巖列丹葩常
希披塵網眇然登雲車鸞情極霄漢鳳想疲煙霞道存
蓬瀛近意愜朝市賒無為坐惆悵虛此江上華

忽夢遊仙

僕本江上客牽跡在方內寤寐霄漢間居然有靈對翕

爾登霞首依然躡雲背
電策驅龍光煙途儼鸞態
承月披金帔連星斛瓊珮
浮識俄易歸真遊邈難再
寥廓沈遐想周遑奉遺誨
流俗非我鄉何當釋塵昧

七言古詩

秋夜長

秋夜長殊未央月明露白
澄清光層城綺閣遙相望
川無梁北風受節南鴈翔
崇蘭委質時菊芳鳴環曳
履出長廊為君秋夜擣衣
裳織羅對鳳凰丹綺雙駕
鴛鴦調砧

亂杵思自傷征夫萬里戍他鄉
鶴關音信斷龍門道路
長君在天一方寒衣徒自香

採蓮曲

採蓮歸綠水芙蓉衣秋風起浪
鳬鴈飛桂棹蘭橈下長
浦羅裙玉腕輕搖櫓樂嶼花
潭極望平江謳越吹相思
苦相思苦佳期不可駐塞外
征夫猶未還江南採蓮今
已暮採蓮花渠今那必盡
娼家官道城南把桑葉何如
江上採蓮花蓮花復蓮花花
葉何稠疊葉翠本羞眉花

紅強如頰佳人不在茲
悵望別離時牽花憐共蒂
折藕愛連絲故情無處所
新物徒華滋不惜西津交
佩解還羞北海鴈書遲
採蓮歌有節採蓮夜未歇
正逢浩蕩江上風又值徘徊
江上月徘徊蓮浦夜相逢
吳姬越女何丰茸共問寒江
千里外征客關山路幾重

臨高臺

臨高臺臨高臺道遠絕浮埃
瑤軒綺構何崔嵬鸞歌鳳吹清
且哀俯瞰長安道萋萋御溝草
斜對甘泉路蒼蒼

茂陵樹高臺四望同佳氣鬱葱葱紫閣丹樓紛照耀壁
房錦殿相玲瓏東迷長樂觀西指未央宮赤城映朝日
綠樹搖春風旗亭百隊開新市甲第千甍分戚里朱輪
翠蓋不勝春疊榭層楹相對起復有青樓大道中繡戶
文牕雕綺櫳錦衾晝不褰羅幃夕未空歌屏朝掩翠粧
鏡晚窺紅為君安寶髻蛾眉罷花叢塵間狹路黯將暮
雲開月色明如素鴛鴦池上兩兩飛鳳凰樓下雙雙度
物色正如此佳期那不顧銀鞍繡轂盛繁華可憐今夜

宿娼家娼家少婦不須顰東園桃李片時春君看舊日
高臺處柏梁銅雀生黃塵

滕王閣

滕王高閣臨江渚珮玉鳴鸞罷歌舞畫棟朝飛南浦雲
朱簾暮捲西山雨閒雲潭影日悠悠物換星移幾度秋
閣中帝子今何在檻外長江空自流

江南弄

江南弄巫山連楚夢行雲幾相送瑤軒金谷上春時玉

童仙女無見期紫霧香煙眇難託清風明月遙相思遙
相思草徒綠為聽雙飛鳳凰曲

落花落

落花落落花紛漠漠綠葉青跼映丹萼與君徘徊上金
閣影拂粧階玳瑁筵香飄舞館茱萸幙落花飛撩亂入
中帷落花春正滿春人歸不歸落花度氛氲遠高樹落
花春已繁春人春不顧綺閣青臺靜且閒羅袂紅巾復
往還盛年不再得高枝難重攀試復旦遊落花裏暮宿

落花間與君落花院臺上起雙鬟

寒夜懷友二首

北山烟霧始茫茫南津霜月正蒼蒼秋深客思紛無已
復值征鴻中夜起

複閣重樓向浦開秋風明月度江來故人故情懷故宴
相望相思不相見

六言古詩附

雜曲

智瓊神女來訪文君蛾眉始約羅裙初薰歌齊曲韻舞
亂行分若向陽臺薦枕何啻得勝朝雲

王子安集卷二

欽定四庫全書

王子安集卷三

唐 王勃 撰

五言律詩

銅雀妓二首

金鳳鄰銅雀漳河望鄴城
君王無處所臺榭若平生
舞席紛何就歌梁儼未傾
西陵松檟冷誰見綺羅情

妾本深宮妓層城閉九重
君王歡愛盡歌舞為誰容
錦

衾不復褰羅衣誰再縫高臺西北望流涕向青松

聖泉宴

并序

玄武山有聖泉焉浸淫歷數百千年乘巖泌湧接磴
分流下瞰長江沙堤石岸咸古人遺跡也茲乃青蘋
綠芰紫苔蒼蘚遂使江湖思遠寤寐寄託既而崇巖
左岐石壑前縈丹甍萬尋碧潭千頃松風唱響竹露
薰空瀟瀟乎人間之難遇也方欲以林壑為天屬琴
樽為日用嗟乎古今代謝方深川上之悲少長同遊

且盡山陰之樂盍題芳什共寓高情詩得泉字

披襟乘石磴列籍俯春泉
蘭氣薰山酌松聲韻野絃
影飄垂葉外香度落花前
興洽林塘晚重巖起夕烟

尋道觀

其觀即昌利觀而張天師居也

芝廬光分野蓬闕盛規模
碧壇清柱闕丹洞肅松樞
玉笈三山記金箱五嶽圖
蒼虬不可見一作得空望白雲衢

散關晨度

關山凌旦開石路無塵埃
白馬高談去青牛真氣來
重

門臨巨壑連棟起崇隈即今揚策度非是棄繻回

別薛華

送送多窮路遑遑獨問津悲涼千里道悽斷百年身
心事同漂泊生涯共苦辛無論去與住俱是夢中人

重別薛華

明月沉珠浦秋風濯錦川樓臺臨絕岬洲渚亘長天
旅泊成千里棲遑共百年窮途惟有淚還望獨潸然

遊梵宇三覺寺

香閣披青磴，瑤臺控紫岑。
葉齊山路狹，花積野壇深。
蘿幌棲禪影，松門聽梵音。
遽欣陪妙躅，延賞滌煩襟。

麻平晚行

百年懷土望，千里倦遊情。
高低尋戍道，遠近聽泉聲。
礧葉纔分色，山花不辨名。
羈心何處盡，風急暮猿清。

送盧主簿

窮途非所恨，虛室自相依。
城闕居年滿，琴樽俗事稀。
開襟方未已，分袂忽多違。
東巖富松竹，歲暮幸同歸。

餞韋兵曹

征驂臨野次別袂慘江垂川霽浮煙歛山明落照移
鷹風凋晚葉蟬露泣一作秋枝亭皋分遠望延想間雲涯

白下驛餞唐少府

下驛窮交日昌亭旅食年相知何用早懷抱即依然
浦樓低晚照鄉路隔風煙去去如何道長安在日邊

杜少府之任蜀州

城闕輔三秦風煙望五津與君離別意同是宦遊人
海

内存知己天涯若比隣
無為在歧路兒女共沾巾

仲春郊外

東園垂柳徑西堰落花津
物色連三月風光絕四鄰
鳥飛村覺曙魚戲水知春
初晴山院裏何處染罽塵

郊興

空園歌獨酌春日賦閒居
澤蘭侵小徑河柳覆長渠
雨去花光濕風歸葉影疎
山人不惜醉唯畏綠樽虛

郊園即事

烟霞春旦

一作早

賞松竹故年心
斷山疑畫障懸溜寫鳴

琴草徧南亭合花濃

一作開

北院深閒居饒酒賦隨興欲

抽簪

觀佛跡寺

蓮座神容儼松崖聖跡餘年長
金跡淺地久石丈疎顏
華臨曲磴傾影赴前除共嗟陵谷遠
俄視化城虛

山居晚眺贈王道士

金壇疎俗宇玉洞侶仙羣
花枝栖晚露峰葉度晴雲
斜

照移山影迴沙擁溜

一作楷

文琴樽方待興竹樹已迎暉

八仙還

寺南又有昌利觀去寺可數里巖還窈窕杖而後進

柰園欣八正松巖訪九仙援蘿窺霧術攀桂俯雲阡

一作

烟代北鸞驂至遼西鶴騎旋終希脫塵網連翼下芝田

春日還郊

閒情兼默語

一作默默

携杖赴巖泉草綠縈新帶榆青綴古

錢魚牀侵岼水鳥路入山烟還題平子賦花樹滿春田

對酒春園作

投簪下山閣携酒對河梁狹水牽長鏡高花送斷香繁
鷺歌似曲疎蝶舞成行自然催一醉非但閱年光

觀內懷仙

玉架殘書隱金壇舊跡速牽花尋紫洞

一作洞

步藥下清

谿瓊漿猶類乳石髓尚如泥自能成羽翼何必仰雲梯

秋日別王長史

別路長

一作餘

千里深恩重百年正悲西候日更動北梁

篇野色籠寒霧山光歛暮烟終知難再奉懷德自潛然

上巳浮江宴韻得遙字

上巳年光促中川興緒遙綠齊山葉滿紅洩岼花銷泉
聲喧後澗虹影照前橋遽悲春望遠江路積波潮

長柳

晨征犯煙磴夕憩在雲關晚風清近壑新月照澄灣郊
童樵唱返津叟釣歌還客行無與晤賴此釋愁顏

羈遊錢別

客心懸隴路遊子倦

一作倦

江干槿豐

一作濃

朝砌靜篠密

夜牕寒琴聲銷別恨風景駐離歡寧竟山川遠悠悠旅
思難

易陽早發

飭裝侵曉月奔策候殘星危閣尋丹嶂迴梁屬翠屏雲
間迷樹影霧裏失峰形復此涼颼至空山飛夜螢

焦岍早行和陸四

侵星違旅館乘月戒征儔複嶂迷晴色虛巖辨暗流猿
吟山漏曉螢散野風秋故人渺何際鄉關雲霧浮

深灣夜宿

主人依山帶江

津途臨巨壑，村宇架危岑。
堰絕灘聲隱，峰交樹影深。
江童暮理楫，山女夜調砧。
此時故鄉遠，寧知遊子心。

傷裴錄事喪子

蘭堦霜候早，松路窈一作臺深。
魄散珠胎沒，芳銷玉樹一作夜

沈。露文晞宿草，烟照慘平林。
芝焚空歎息，流恨滿蘼金。

五言排律

泥谿

弭棹凌奔壑，低鞭躡峻岐。
江濤出岝嶺，險峰登入雲。
危溜急，船文亂。巖斜騎影移，
水烟籠翠渚。山照落丹崖，
風生蘋浦。葉露泣。一作竹潭枝泛水，雖云美勞歌，誰復知。

秋日仙遊觀贈道士

一作駱賓王詩，無首四句。

石圖分帝宇，銀牒洞靈宮。
迴丹縈岫室，複翠上巖櫺。
霧濃金竈靜，雲暗玉壇空。
野花常捧露，山葉自吟風。
林泉明月在，詩酒故人同。
待余蓬石髓，從爾命飛鴻。

出境遊山二首

源水終無路山阿若有人驅羊先動石走兔欲投巾
洞晚秋泉冷巖朝古樹新峰斜連鳥翅磴疊上魚鱗
化鶴千齡早元龜六代春浮雲今可駕滄海自成塵

振翮凌霜吹正月佇天淥為鑣凌翠壑飛軫控青岑
巖深靈竈浸澗毀石渠沈宮闕雲間近江山物外臨
玉壇棲暮夜珠洞結秋陰蕭蕭離俗影擾擾望鄉心
誰意山遊好屢傷人事侵

三月曲水宴

彭澤官初去河陽賦始傳田園歸舊國詩酒間長筵列
室窺丹洞分樓瞰紫烟縈迴亘津渡出沒控郊鄣鳳琴
調上客龍轡儼羣仙松石偏宜古藤蘿不記年重簷交
密樹複磴擁危泉抗石晞南嶺乘沙眇北川傳巖來築
處磻溪入釣前日斜真趣遠幽思夢涼蟬

盧照隣和得樽字附

風烟彭澤里山水仲長園繇來棄銅墨本自重琴樽
高情邈不嗣雅道今復存有美光時彥養德坐山樊

門開芳杜徑，室距桃花源。公子黃金勒，仙人紫氣軒。
長懷去城市，高詠狎蘭蓀。連沙飛白鷺，孤嶼嘯玄猿。
日影巖前落，雲花江上翻。興闌車馬散，林塘夕鳥喧。
五言絕句

晚屆鳳州

寶鷄辭舊域，仙鳳歷遺墟。去此近城闕，青山明月初。
羈春

客心千里倦春事，一朝歸還傷北園。裏重見落花飛。

林塘懷友

芳屏畫春草仙杼織朝霞何如山水路對面即飛花

山扉夜坐

抱琴開野室携酒對情人林塘花月下別是一家春

春莊

山中蘭葉徑城外李桃園直知人事靜不覺鳥聲喧

春遊

客念紛無極春淚倍成行今朝花樹下不覺戀年光

春園

山泉兩處晚花柳一園春還持十日醉共作百年人

林泉獨飲

邱壑經塗賞花柳遇時春相逢今不醉物色自輕人

登城春望

物外山川近晴初景靄新芳郊花柳徧何處不宜春

他鄉叙興

綴葉歸烟晚乘花落照春邊城琴酒處俱是越鄉人

夜興

野烟含夕渚山月照秋林還將中散興來偶步兵琴

臨江二首

泛泛東流水飛飛北上塵歸驂將別棹俱是倦遊人
去驂嘶別路歸棹隱寒洲江皋木葉下應想故城秋

江亭夜月送別二首

江送巴南水山橫塞北雲津亭秋月夜誰見泣離羣
亂烟籠碧砌飛月向南端寂寂離亭掩江山此夜寒

別人四首

久客逢餘閏他鄉別故人自然堪下淚誰忍望征塵
江上風烟積山幽雲霧多送君南浦外還望將如何
桂船初不駐蘭筵幸未開林塘風月賞應待故人來
霜華淨天末霧色籠江際客子常畏人何為久留滯

贈李十四四首

野客思茅宇山人愛竹林琴樽唯待處風月自相尋
小徑偏宜草空庭不厭花平生詩與酒自得會仙家

亂竹開三徑飛花滿四鄰從來揚子宅別有尚玄人
風筵調桂軫月徑引藤杯直當花院裏書齋望曉開

早春野望

江曠春潮白山長曉岫青他鄉臨眺

一作
眺

極花柳映邊

亭

山中

長江悲已滯萬里念將歸况屬高風晚山山黃葉飛

冬郊行望

桂密巖花白梨疎林葉紅江皋寒望盡歸念斷征蓬

寒夜思友三首

久別侵懷抱他鄉變容色月下調鳴琴相思此何極
雲間征思斷月下歸愁切鴻鴈西南飛如何故人別
朝朝翠山下夜夜滄江曲復此遙相思清尊湛芳綠

始平晚息

觀闕長安近江山蜀道賒客行朝復夕無處是鄉家

扶風晝屈離京浸遠

帝里金莖去扶風石柱來山川殊未已行路方悠哉

普安建陰題壁

江漢深無極梁岷不可攀山川雲霧裏遊子幾時還

九日

九日重陽節開門有菊花不知來送酒若箇是陶家

七言絕句

秋江送別二首

早是他鄉值早秋江亭明月帶江流已覺逝川傷別念

復看津樹隱離舟

歸舟歸騎儼成行
江南江北互相望
誰謂波瀾纔一水
已覺山川是兩鄉

蜀中九日登玄武山旅眺

紀事云武山在東蜀勃以檄雞文斤出沛王府

既廢客劍南王
有遊玄武山詩

九月九日望鄉臺他席他鄉送客杯
人今一作情已厭南

中苦鴻鴈那從北地來

盧照鄰九月九日玄武山旅眺附


九月九日眺山川歸心歸望積風煙他鄉共酌金花
酒萬里同悲鴻鴈天

邵大震九月九日登玄武山旅眺附

九月九日望遙空秋水秋天生夕風寒鴈一向南飛
遠遊人幾度菊花叢

河陽橋代竇郎中佳人答楊中舍

披風聽鳥長河路臨津織女遙相妬判知秋夕帶啼還
那及春朝携手度



王子安集卷三

欽定四庫全書

集部

王子安集卷四至

七

詳校官監察御史_臣劉湄

檢討_臣何思鈞覆勘

總校官檢討_臣何思鈞

校對官編修_臣曹錫齡

謄錄監生_臣吳向仁

欽定四庫全書

王子安集卷四

唐 王勃 撰

序

續書序

序曰書以記言其來尚矣越在三代左史職之百官以理萬人以察揚于王庭用實犬馬苟非可以變理情性平章邦國敷彛倫而叙要道察時變而經王猷樹皇極

之網維資生靈之視聽皆可畧也昔者仲尼之述書也將以究事業之通而正性命之理故曰吾欲托之空言不如附之行事道德仁義於是乎明刑政禮樂於是乎出非先王之德行不敢傳非先王之法言不敢道紀千數百歲斷自唐虞迄于周漢風流所存百篇而已以此見聖人言約理舉神明不勞而體時務之撰矣故能法象天地同符易簡借前箸於筌蹄驅後主於軌物密而顯宏而奧久而彌新用而不竭非古之聰明聖智玄覽

博達孰能為此哉孔安國曰帝王之制坦然明白可舉而行嗟乎其言甚大可使南面稱聖人之後矣自時以降史述陵遲人自為家標指失中陳事亂而無當制理參而不一繇是大典散而人文乖是非繁而取舍謬與夫古先哲人制述之意不其疎乎我先君文中子實秉睿懿生於隋末覩後作之違方憂異端之害正乃喟然曰宣尼既沒文不在茲乎遂約大義刪舊章續書為三百六十篇考偽亂而修元經正禮樂以旌後王之失述

易讚以申先師之旨經始漢魏迄于有晉擇其典物宜於教者續書為百二十篇而廣大悉備嗟乎賢聖之述豈多為哉噫亦足垂訓作則冒天下之道如斯而已矣當時門人百千數董薛之徒竝受其義遭代喪亂未行于時歷年永久稍見殘缺貞觀中大原府君考諸六經之目則亡其小序其有錄而無篇者又十六焉嗚呼茲不可復見矣家君欽若丕烈圖終休緒乃例六經次禮樂叙中說明易讚永惟保守前訓大克敷遺後人勅凡

第五六冠者童子六七祇祇怡怡講問伏漸之日久矣
躬奉成訓家傳異聞猶恐不得門而入才之不逮至遠
也是用厲精激憤宵吟晝詠庶幾乎學而知之者其修
身慎行恐辱先也豈聲祿是徇前人之不繼是懼間者
承命為百二十篇作序而兼當補修其闕爰考衆籍共
參奧旨泉源浩然固識攸濟嗚呼小子何敢以當之也
其盡心力乎始自總章二年洎乎咸亨五年刊寫文就
定成百二十篇勒成二十五卷昔者文中子曰漢魏之

禮樂未足稱其書不可廢也尚有近古之對議存焉制
詔冊則幾乎典誥矣後之達晤者將有得於斯文乎于
時龍集闔茂勉踵前修在大唐御天下之五十七祀也

黃帝八十一難經序

黃帝八十一難經是醫經之秘錄也昔者岐伯以授黃
帝黃帝歷九師以授伊尹伊尹以授湯湯歷六師以授
太公太公授文王文王歷九師以授醫和醫和歷六師
以授秦越人秦越人始定立章句歷九師以授華陀華

陀歷六師以授黃公黃公以授曹夫子曹夫子諱元字
真道自云京兆人也蓋授黃公之術洞明醫道至能遙
望氣色徹視腑臟洗腸剗胸之術往往行焉浮沉人間
莫有知者勃養於慈父之手每承過庭之訓曰人子不
知醫古人以為不孝因竊求良師陰訪其道以大唐龍
朔元年歲次庚申冬至後甲子子遇夫子於長安撫勃
曰無欲也勃再拜稽首遂歸心焉雖父伯兄弟不能知
也蓋授周易章句及黃帝素問難經乃知三才六甲之

事明堂王匱之數十五月而畢將別謂勃曰陰陽之道不可妄宣也針石之道不可妄傳也無猖狂以自彰當陰沉以自淡也勃受命伏習五年于茲矣有升堂觀奧之心焉近復鑽仰太虛導引元氣覺滓穢都絕精明相保方欲坐守神仙棄置流俗噫蒼生可以救耶斯文可以存耶昔太上有立德其次有立功其次有立言非以徇名也將以濟人也謹錄師訓編附聖經庶將來君子有以得其用心也

四分律宗記序

昔在調御利見迦維光宅淨都撫臨法界抑揚垢路之
業以疆理情田闡導毗尼之藏以隄防性海二邊雲徹
方知寶相之尊十刹風行乃識真如之貴將使龍象縑
服維明克允驚驚玄明有恥且格五篇垂範豈同訓夏
之科七聚分宗寧比歌虞之制功存離欲道在降魔仙
苑創基因善果以調物提河滅跡憑淨戒以為師誠拯
溺之舟航而禦點之銜策者矣故能莊嚴百福粉繪

三身摧憍慢山拔生死樹覆簣菩薩之道濫觴正覺
之源除惑箭而斷愛枝銷恚刀而解疑網自銀棺掩耀
金杖殊珍五師煙騰四分雲喬波離睿旨明而更明飲
光妙跡盛而愈盛其後卑摩覃思猶沉赤水之輝惠遠
研精尚玷玄巖之彩遂使瓊編浩汗利涉迷於要津瑤
軸紛綸登高暗於飛陞孰習者博而寡用志學者勞
而少功七衆所以遲迴八部錄其太息不應冥發膚
感潛融爰挺異才式扶象訓有西京太原寺索律師

俗姓范氏其先南陽人也殷霸洪肩周藩茂族八鸞與
四牡競馳紫繪與青螭疊照六軍卿冑績著於鍾鼎三
傳儒門業流於訓詁律師冲襟霞映峻局霜淒筠抱顯
於髫齡蘭芬凝於卣齒繇是糠粃禮樂錙銖名教以堯
舜為塵勞以周孔為桎梏爰依白法遂托玄徒揆鷲嶺
之微言得龍宮之秘藏咸亨之祀椒房諒陰捨槐里而
構竹園因金穴而開銀地伽藍肇建號曰太原明陽所
及咸收時望自價隆康會譽重摩騰竺法猷之苦節支

道林之遠致將何以發明禪宇光應綸言律師乃以道
衆羽儀釋門棟幹粵自弘濟來遊太原經行德人於斯
為盛既而懼六和之紊緒悼三聚之乖宗稽法令之遺
文討惠猷之舊業網羅近護吞含覺明原始要終揆牘
索隱芟夷疣贅剪截駢枝收絕代之精微詰往聖之紕
繆葭灰屢變槐燧驟遷開遮持犯之異同廢立止作之
輕重故以該象牙之扇窮貝葉之圖鑽研刊削五載而
就名曰開四分律宗記凡十卷三十七萬六百三十言

律師又以為仲尼述易申妙典於繫辭元凱談經託餘
文於釋例爰因多暇更輯舊章牢籠秘密之宗發揮沉
鬱之旨名曰開四分律宗拾遺鈔凡十卷四十萬餘言
所以裨助三明抑揚四謗弘八正之道成一家之言庶
使衆善雷奔羣疑霧歛照歡戚之兩鏡蕩欣憂之二瓶
憑此戒田方躋定境豈直功周沙甸道制鐵圍而已哉
弟子才非玄度識劣真長本乏凌雲之詞虛荷彌天之
眷揄揚盛烈顧孫綽而多慚歸依勝侶仰邠情而自勗

輒牽庸陋輕序德音豈比夫公理昌言資繆實之引太
沖作賦假士安之談蓋所謂觀博而識班聞樂而竊抃
者矣故曰四分律宗記序

入蜀紀行詩序

總章二年五月癸卯余自常安觀景物于蜀遂出褒斜
之隘道抵岷峨之絕徑超玄谿厯翠阜迨彌月而臻馬
若乃採江山之俊勢觀天地之奇作丹壑爭流青峰雜
起陵濤鼓怒以伏注天壁嵯峨而橫立亦宇宙之絕觀

者也雖莊周詫呂梁之險韓侯怯孟門之峻曾何足云
蓋登培塿者起衡霍之心游涓澮者發江湖之思况乎
窮覽勝事足踐靈區煙霞為朝夕之資風月得林泉之
助嗟乎山川之感召多矣余能無情哉爰成文律用宣
行唱編為三十首投諸好事焉

三月上巳祓禊序

觀夫天下四方以宇宙為城池人生百年用林泉為窟
宅雖朝野殊致出處異途莫不擁冠蓋於煙霞披薜蘿

於山水況乎山陰舊地王逸之池亭永興新交許玄度
之風月琴臺寥落猶停隱遯之賓釀渚荒涼尚過逢迎
之客仙舟溶裊若海上之槎來羽蓋參差似遼東之鶴
舉或昂騏驥或泛飛鳧俱安名利之場各得逍遙之地
而上屬無為之道下棲玄邈之風永淳二年暮春三月
遲遲風景出沒媚於郊原片片仙雲遠近生於林薄雜
花爭發非止挑蹊羣鳥亂飛有踰鸚谷王孫春草處處
爭鮮仲阮芳園家家竝翠於是攜旨酒列芳筵先袞袂

於長洲却申交於促席良談吐玉長江與斜漢爭流清
歌遶梁白雲將紅塵竝落他鄉易感增悽愴於茲辰羈
客何情更歡娛於此日加以今之視昔已非昔日之歡
後之視今亦是今時之會人之情也能不悲乎且題姓
字以表襟懷使夫會稽竹箭則推我於東南崑阜琳琅
亦歸予於西北

守歲序

歲月易盡光陰難駐春秋冬夏錯四序之涼炎甲乙丙

丁紀三朝之氣數十二月之陰氣玉律窮年一萬歲之
休禎金觴獻壽賁鼓雷動煙火星流偃子黃童統鈎陳
而驅赤疫諸王等集陳玉帛而朝諸侯京兆天中竦樓
臺而徹漢長安路上亂車馬而飛塵王丞相之登臨行
將在目戴侍中之重席忽爾明朝槐火滅而寒氣消蘆
灰用而春風起魚鱗布葉爛五色而翻光鳳腦吐花燦
百枝而引照悲夫年華將晚志事寥落公孫弘之甲第
天子未知王仲宣之文章公卿不識對他鄉之風景憶

故里之琴歌栢葉為銘影泛新年之酒椒花入頌先開
獻歲之詞作者七人同為六韻

山亭興序

仁者樂山智者樂水深山大澤龍蛇為得性之場廣漢
巨川珠貝是有殊之地豈徒茂林修竹王右軍山陰之
蘭亭流水長堤石季倫河陽之梓澤下官天性任真直
言淳朴拙容陋質眇少之丈夫蹇步窮途坎壈之君子
文史足用不讀非道之書氣調不羈未被可人之目頴

川人物有荀家兄弟之風漢代英奇守陳氏門宗之德
樂天知命一十九年負笈從師二千餘里有弘農公者
日下無雙風流第一仁崖智宇照臨明日月之輝廣度
冲襟磊落壓乾坤之氣王夷甫之瑤林瓊樹直出風塵
嵇叔夜之龍章鳳姿混同人野雄談逸辯吐滿腹之精
神達學奇才抱填胸之文籍簪裾見屈輕脫履於西陽
山水來遊重橫琴於南澗百年奇表開壯志於高明千
里心期得神交於下走山人對興即是桃花之源隱士

相逢不異菖蒲之澗黃精野饌赤石神脂玉案金盤徵
石髓於蛟龍之窟山樽野酌求玉液於蓬萊之峰溪橫
燕尾巖豎龍頭鍛野老之真珠掛幽人之明鏡山腰半
折溜王烈之香膏洞口橫開滴嚴遵之芳乳藤牽赤架
南方之物產可知粉漬青田外域之謠風在即人高調
遠地爽氣清抱玉策而登高出瓊林而更遠漢家二百所
之都鄙宮殿平看秦氏四十郡之封畿山河坐見班孟
堅騁兩京雄筆以為天地之奧區張平子奮一代宏

才以為帝王之神麗珠城隱隱闌干象北斗之宮清渭
澄澄滉漾即天河之水長松茂栢鑽宇宙而頓風雲大
壑橫溪吐江河而懸日月鳳凰神岳起煙霧而當軒鸞
鵠春泉雜風花而滿谷望平原蔭藂薄山情放曠即滄
浪之水清野氣蕭條即崆峒之人智搖頭坐唱頓足起
舞風塵灑落直上天池九萬里丘墟雄壯傍吞少華五
千仞裁二儀為輿蓋倚八荒為戶牖榮者吾不知其榮
美者吾不知其美下官以詞鋒直上振筆札而前驅高

明以翰苑橫開列文章於後殿情興未已即令樽中酒
空彩筆未窮須使山中兔盡

山亭思友人序

高興之後中宵起觀舉目四望風寒月清鄰人張氏有
山亭焉洞壑橫分奇峰直上鬱然有造化之功矣嗟乎
大丈夫荷帝王之雨露對清平之日月文章可以經緯
天地器局可以畜洩江河七星可以氣衝八風可以調
合獨行萬里覺天地之崢嶸高枕百年見生靈之齷齪

雖俗人不識下士徒輕顧視天下亦可以蔽寰中之一
半矣惜乎此山有月此地無人清風入琴黃雲對酒雖
形骸真性得禮樂於身中而宇宙神交卷煙霞於物表
至若開闢翰苑掃蕩文場得宮商之正律受山川之傑
氣雖陸平原曹子建足可以車載斗量謝靈運潘安仁
足可以膝行肘步思飛情逸風雲坐宅於筆端興洽神
清日月自安於調下云爾

王子安集卷四

欽定四庫全書

王子安集卷五

唐 王勃 撰

序

滕王閣詩序

南昌故郡洪都新府星分翼軫地接衡廬襟三江而帶
五湖控蠻荆而引甌越物華天寶龍光射牛斗之墟人
傑地靈徐孺下陳蕃之榻雄州霧列俊彩星馳臺隍枕

夷夏之交賓主盡東南之美都督閻公之雅望祭戰遙
臨宇文新州之懿範檐帷暫駐十旬休暇勝友如雲千
里逢迎高朋滿座騰蛟起鳳孟學士之詞宗紫電清霜
王將軍之武庫家君作宰路出名區童子何知躬逢勝
饒時維九月序屬三秋潦水盡而寒潭清煙光凝而暮
山紫儼驂駢於上路訪風景於崇阿臨帝子之長洲得
仙人之舊館層巒聳翠上出重霄飛閣流丹下臨無地
鶴汀鳬渚窮島嶼之縈迴桂殿蘭宮列岡巒之體勢披

繡闥俯雕甍山原曠其盈視川澤盱其駭矚閭閻撲地
鐘鳴鼎食之家舸艦彌津青雀黃龍之軸虹銷雨霽彩
徹區明落霞與孤鶩齊飛秋水共長天一色漁舟唱晚
響窮彭蠡之濱鴈陣驚寒聲斷衡陽之浦遙襟俯暢逸
興遄飛爽籟發而清風生纖歌凝而白雲遏睢園綠竹
氣凌彭澤之樽鄴水朱華光照臨川之筆四美具二難
并窮睇眄於中天極娛遊於暇日天高地迴覺宇宙之
無窮興盡悲來識盈虛之有數望長安於日下指吳會

雲間地勢極而南溟深天柱高而北辰遠關山難越誰
悲失路之人萍水相逢盡是他鄉之客懷帝閭而不見
奉宣室以何年嗟乎時運不齊命途多舛馮唐易老李
廣難封屈賈誼於長沙非無聖主竄梁鴻於海曲豈乏
明時所賴君子安貧達人知命老當益壯寧移白首之
心窮且益堅不墜青雲之志酌貪泉而覺爽處涸轍以
猶歡北海雖賒扶搖可接東隅已逝桑榆非晚孟嘗高
潔空餘報國之情阮籍猖狂豈效窮途之哭勃三尺微

命一介書生無路請纓等終軍之弱冠有懷投筆慕宗
慤之長風舍簪笏於百齡奉晨昏於萬里非謝家之寶
樹接孟氏之芳鄰他日趨庭叨陪鯉對今晨捧袂喜託
龍門揚意不逢撫凌雲而自惜鍾期既遇奏流水以何
慚嗚呼勝地不常盛筵難再蘭亭已矣梓澤丘墟臨別
贈言幸承恩於偉饒登高作賦是所望於羣公敢竭鄙
誠恭疏短引一言均賦四韻俱成請灑潘江各傾陸海
云爾

遊山廟序

吾之有生二十載矣雅厭城闕酷嗜江海常學仙經博涉道記知軒冕可以理隔鸞鳳可以術待而事親多衣食之虞登朝有聲利之迫清識滯於煩城仙骨摧於俗境嗚呼阮籍意疎嵇康體放有自來矣常恐運促風火身非金石遂令林壑交喪煙霞板蕩此僕所以懷泉塗而惴恐臨山河而嘆息者也粵以勝友良暇相與遊於玄武西山廟蓋蜀郡三靈峰也山東有道君廟古者相

傳以名焉爾其丹壑藂倚玄嵒糾合俯臨萬仞平視重
玄乘杳冥之絕境屬芬華之暮節玉房跨霄而懸居瓊
臺出雲而高峙亦有野獸羣狎山鷲互囀崇松埒巨栢
爭陰積瀨與幽湍合響眇眇焉迢迢焉王孫何以不歸
羽人何以長往其玄都紫微之事耶方斂手鐘鼎息肩
巖石絕視聽於寰中置形骸於度外不其然乎時預乎
斯者濟陰鹿宏肩安陽邵令遠耳盍詩以言志不以韻
數裁焉

梓潼江南泛舟序

咸亨二年六月癸巳梓潼縣令韋君以清湛幽凝鎮流
靖俗境內無事艤舟於江潭縱觀於丘壑渺然有山林
陂澤之思遂長懷悠想周覽極睇思其人則呂望藉茅
於磻溪之陰屈平製芰於沅陽之浦覺瀛洲方丈森然
在目於是間以投壺酬以妙論亦有嘉餚旨酒鳴絃朗
笛以補尋幽之致焉預於斯者若干人爾

上巳浮江宴序

吾之生也有極時之過也多緒若夫遭主后之明聖屬
天地之貞觀得猷畝之相保以農桑為業而託形宇宙
者幸矣况乃偃泊山水遨遊風月樽酒於其外文墨於
其間則造化之於我得矣太平之縱我多矣茲以上已
芳節雲開勝地大江浩曠羣山紛糾出重城而振策下
長浦而方舟林壑清其顧盼風雲蕩其懷抱于時序躔
青律運啟朱明輕萸秀而郊成青落花盡而亭舉晚丹
鷺紫蝶候芳晷而騰姿早鷺歸鴻俟迅風而弄影巖暄

蕙密野淑蘭滋弱荷抽紫疎萍泛綠于是儼松舸於石
嶼停挂楫於璇潭指林岸而長懷出河洲而極睇妍妝
袿服香驚北渚之風翠幙玄帷彩綴南津之霧若乃尋
曲渚歷廻溪榜謳齊引漁歌互起飛沙濺石湍流百勢
翠嶮丹崖岡巒萬色亦有銀鈎犯浪掛頰翼於文竿瓊
舸乘波耀錦鱗於畫網鍾期在聽玄雲白雪之琴阮籍
同歸紫桂蒼梧之醴既而遊盤興遠景促時淹野日照
晴山煙送晚方披襟朗詠餞斜光於碧岫之前散髮高

吟對明月於青溪之下客懷既暢遊思遄征視泉石而
如歸佇雲霞而有自昔周川故事初傳曲路之悲江甸
名流始命山陰之筆盍遵清轍共抒幽襟俾後之視今
亦猶今之視昔一言均賦六韻齊疏誰知後來者難輒
以先成為次

綿州北亭羣公宴序

下官人間獨傲海內少徒志不屈於王侯身不絕於塵
俗孤吟五嶽長嘯三山昔往東吳已有梁鴻之志今來

西蜀非無張載之懷況乎踐名場攜勝友風月無幾琴
酒俄乖半面十年一別千里何少府故人攀桂撫金石
而論心韓法曹新識班荆臨江湖而執手離亭北望煙
霞生故國之悲別館南開風雨積他鄉之思于時蒼雲
寡色白日無光沙塵起而桂浦昏鳬鴈下而蘆洲晚傍
隣蒼野霜封橘柚之園斜枕碧潭鴈斷芙蓉之水既而登
臨惜別驂駕少留季札何人親送贈綰子荆不敏思掛
傾城惆悵北梁揖琴臺而漸間徘徊東道思錦署以行

遙嗟乎人事乖矣江山遠矣請命離前之筆為題別後
之資五際飛文想羣公之不讓一言留贈知下筆之有
神

夏日登龍門樓寓望序

夫益者三友則道術可存同心三人則金蘭可浴况乎
詩書舊好披樂廣之高天鄉黨新知掃顏回之陋巷尋
勝地叙清蕪脫野客之荷衣入幽人之挂坐榴花浮酌
對文舉而無憂葛蔓調絃撫鍾期而有遇既而南方夏

晚北牖晴開中園之弱柳含煙曠野之陰雲蔽日低虹
飲水向溪谷而全斜戲鳥凌空狎林亭而半度興含情
逸共敦行役之期擱管含毫獨對當仁之序

夏日登韓城門樓寓望序

下官狂走不調東西南北之人也流離歲月羈旅山川
輟仙駕於殊鄉遇良朋於異縣面勝地陟危樓放曠懷
抱驅馳耳目韓原與壤昔時開戰鬪之塲秦塞雄都今
日列山河之郡池臺左右覺風雲之助人林麓周廻觀

巖泉之入興則有驚花亂下戲鳥平飛荷葉滋而曉霧
繁竹院靜而炎氣息賞歡文酒思挽雲霄人賦一言庶
旌六韻云爾

秋日遊蓮池序

人間齷齪抱風雲者幾人庶俗紛紜得英奇者何有煙
霞召我相望道街之門文酒起予放浪沉潛之地少留
逸客塞鴈飛鳴北斗橫而天地秋西金用而風露降幽
居少事野性多閒登石岸而鋪筵坐沙場而列席琳瑯

觸目朗月清風之後人珠玉在傍鸞鳳虬龍之君子汀
洲地遠波濤濺日月之輝人野路殊原隰擁神仙之氣
平郊樹直曲浦蓮肥隱士泥清仙人水綠越林亭而極
望生死都捐出宇宙以長懷心靈若喪悲夫秋者愁也
酌濁酒以蕩幽襟志之所之用清文而銷積恨我之懷
矣能無情乎

越州秋日宴山亭序

昔王子敬瑯琊之名士常懷習氏之園阮嗣宗陳留之

俊人直至山陽之坐豈非琴樽遠契必兆朕於佳辰風
月高情每留連於勝地是以東山可望林泉生謝客之
文南國多才江山助屈平之氣況乎揚子雲之故地巖
壑依然宓子賤之芳猷絃歌在屬紅蘭翠菊俯映砂亭
黛栢蒼松深環玉砌參差夕樹煙侵橘柚之園的歷秋
荷月照芙蓉之水既而星廻漢轉露下風高銀燭擣花
瑤觴抒興一時仙馭方深擯俗之懷五際飛文時動緣
情之作人分一字四韻成篇

秋日宴洛陽序

夫以東京勝地南呂高秋三塗鎮而九派分白露下而
清風肅或出或處人多朝野之歡以嬉以遊時極登臨
之所征衣流寓切下走之蓬襟解榻邀期屬上賓之桂
席於是齊道實款琴樽倜儻論心留連促膝但有潘楊
之密戚得無管鮑之深知簪組盛而車馬喧庭宇虛而
管絃亮近臨銅陌斜控銀墟菊照新花泛輕香於遠次
荷凋晚葉翻翠影於長波聽矚方窮獻酬逾洽年忘小

大傲天地於平生志混榮枯得林泉之意氣願長繩以
繫日幾近光陰思短札以凌雲或陳歌咏人採古韻成
者先呈

王子安集卷五